


VOILA

51



WEINERSTUFLUG
BUDGET-FASCHNACHT
NO NIES
EMILIA
GRUPPENUSCH
KURZ
NILS
DAMBOURE-SUMMERUSCH
ROLI-SCHLAGER-MOVE
JUNGI
FRAUEBUMMEL
HERREBUMMEL
TATTOO
ROLI-GÖNNER
TERMINKALÄNDER
WANDERSTUFLUG
RENE
ZUGBEGLEITER-UTAUER
BRÄUT



Ihr
ElektroTeam
für jeden Fall!

MORITZ HUNZIKER AG

MORITZ HUNZIKER AG
Elektro - Telefon - TV - EDV
CH - 4019 Basel
Kleinhüningerstrasse 183

Tel. +41 61 631 35 35
Fax +41 61 631 36 66
info@elektro-hunziker.ch
www.elektro-hunziker.ch

Inseratetarif:

1 Syte	1 Usgoob	90.- Frangge
1 Syte	4 Usgoobe	270.- Frangge
1/2 Syte	1 Usgoob	50.- Frangge
1/2 Syte	4 Usgoobe	150.- Frangge
1/4 Syte	1 Usgoob	30.- Frangge
1/4 Syte	4 Usgoobe	90.- Frangge

Titelbild:

Bunte Oobe - Rolli Schlager Move 2014

Dezämber 2014

Liebi Rolli

S Voilà Team duet Euch do griesse
mr wünsche scheeni Fescht dääg, dient se griesse.
E paar vo uns gönñ wohrschinlig nid furt,
an dere Stelle begriesse mr härzlig dr Kurt.
Und natürlig au alli neue Junge,
d'Vorstellig vo ihne isch uns ändlig glunge.
Letschte Summer jagt ei Fescht s andere,
Tattoo, Schlagermove oder mr sinn eifach go wandere.
Bald sinn Dreikeenig, Vogel Gryff, s Offizielle,
dr Keenig am Drummeli und scho gli kasch vo dr Fasnacht vrzelle
Also blibet dra und zwäg
jetzt, morn und all die Dääg



s Voilà Team

Inhalt Stamm, Layout, Gschtaltig & Dätschmaischtäre: **Nadine Nickler**

Mitässer & kreativi Mitdängger: **Andrea Roth & Marcus Hablützel**

Inhalt Jungi Garde: **Nicole Weber & Conny Kühner**

Inhalt Alti Garde: **Thomas Wyss**

Versand: **Prisca Häner**

baslerrolli@gmail.com

<http://www.baslerrolli.ch/>

Redaktionsschluss Voilà 52:

26. März 2015

Basler Rolli Jungi Garde & Stamm TERMINKALÄNDER

Wenn	Was	Wo	Zyt	Wär
DO 18.12.2014	Rolli-Wiehnacht			Stamm
DO 08.01.2015	Erschti Yiebig, Gruppe einzel			Stamm, JG
DO-SA 15-17.01.2015	Offiziells			Stamm, JG, AG
SA 24.01.2015	Yebigs-Samschtig, Rätz-Stadt		10:00	Stamm
FR 30.01.2015	Damburemarschiebig			Stamm
FR 06.02.2015	Stellprob Drummeli			Stamm
SA-FR 07.-13.02.2015	Drummeli			Stamm
SO 22.02.2015	Latärne-Ypfiffe	Münschterplatz	17:30	Stamm, JG, AG
MO-MI 23.-25.02.2015	Fasnacht			Stamm, JG, AG
SO 08.03.2015	Bummel			Stamm
SO 15.03.2015	Bummel			JG, AG
SA-SO 21.-22.03.2015	Skiweekend	Horneggli		Stamm

Die aktuelle Termin vo dr Alte Garde
wärde über's Internet mitteilt



Scharf sehen.

Schneider.

Julia Borer, Studentin

**OPTIK
SCHNEIDER
BASEL**

Optik Schneider AG
Spalenring 15, 4055 Basel

Telefon 061 381 91 91
www.optik-schneider-basel.ch



Liebe Eltern und Freunde der Jungen Garde

Wie jedes Jahr gelangen wir an Sie, mit dem Anliegen genügend Zugbegleiter für die kommende Fasnacht zu finden. Die Betreuung der Jungen Garde während der Fasnacht steht an erster Stelle! Damit wir aber eine gute Betreuung haben, benötigen wir noch einige Zugbegleiter!

DESHALB SIND WIR AUF EURE HILFE ANGEWIESEN!!!

Wir suchen verantwortungsbewusste **Eltern, Omis, Opis, Götti, Gottis etc.**, die Lust haben, während „de drey scheenschte Dääg“ unsere ca. 40 jungen Rolli zu betreuen und zu begleiten.

Der zeitliche Aufwand für die Betreuung sieht folgendermassen aus:

Montag, 23. Februar 2015	Morgestraich: 03.30 – ca. 07.00 Cortège und Abend: 13.30 – ca. 22.00
Dienstag, 24. Februar 2015	Kinderfasnacht: 13.30 – ca. 18.30
Mittwoch, 25. Februar 2015	Cortège und Abend: 13.30 – ca. 24.00

Wir sind auch für einen **teilweisen Einsatz sehr dankbar**. Bei Interesse und weiteren Fragen melden Sie sich bei Simone Brütsch Thoma (Tel. 061 381 49 18 oder s.bruetsch-thoma@bluewin.ch).

Für eine wunderschöne Fasnacht danken wir jetzt schon allen freiwilligen Begleitern.

Euer Vorstand Junge Garde

Nicole**Si**mon**Ka**rin

Administrativs / Rolli-Gönner

Wenn Du öbber kensch wo d'Basler Rolli, im Spezielle dr Stamm und die Jungi Garde, gärn wurd unterstützte, drnoo mach us em e **Rolli-Gönner**!

➤ **Rolli-Gönner SILBER:**

- griegt s Voilà, s Fasnachtsprogramm und d'Yladig fir s'Latärneabhoole
- könne vom Vorbezugsrächt fir Drummelibiljee Gebruch mache
fir CHF 50.- / Joor

➤ **Rolli-Gönner GOLD:**

- Leischtige analog Gönner-Silber
- e VIP-Apéro 1xjöörig aalässig vom e Drummeli oder eme andere Aaloss
fir CHF 100.- / Joor

Unter www.baslerrolli.ch findsch alli Informatione und iber „Kontakt“ kasch die nye Gönner aamälde.

Mir freyen'is uff alli Eltere, Partner, Verwandte, Fründinne und Fründe wo uns gärn dien unterstützte!

Und saage jetzt scho: VYYLE DANGG!!

Ab  ff
d'Gass!

crome.ch

Immer unterwegs für Sie.
www.undernaehrer-ag.ch

Unternährer
Unser Elektroprofi

ALEA ALEXANDRA

Ab sofort wohnt d Alea bi uns dehei.
3440 Gramm schwer und 48cm klei.
Am 31. Auguscht 2014, 9.26 Uhr, dr
erschti Schrei,
über dr Nochwuggs freue mir uns
sehr, mir drei!

Irina und Philipp mit em Nico



Buechler
Drummelbau &
Drummelschuel
Austrooss 43
4051 Basel

Nochwuggs / Emilia / Nils

Hallo ich bi d Emilia Marie-Luise, ich bi am 18.6.14 am 15.54 ufd
Wält ko, bi 2940 gr schwer und 47 cm gross.

Ich und s Mami hän uns guet erholt und jetzt halti dr Papi und s
Mami kräftig uf Trab.

Die stolze Eltere
Michèle und Dominik



Liebi Fründe und Verwandte
Lieb klai Brickerli ha ich
am 29. Juli 2014 becho.

Miiiiii

Nils Gabriel

isch jetz do!

Bi dr Geburt sigg er 49cm lang und 3380g schwerer gsii
Ich sott au emol eso 'ne Mäggeli gsii sii,
das fällt mir im Traum jo nit yy.

Über Euri Gschänggeli händ mir uns ganz fescht ofrent
Und ich ha gsch, niemerl vo Euch het's greut.
Vieeele liebe Danyy, au fir Euri Glückwünsch,
e liebe Graess au vo mim Mami un Papi!


Euri Renja

Nochwuggs / Neu bi de Junge



Wie heissisch?	Lea	Alia	Jasmin
Wie alt bisch?	7	9	8
Wo wohnsch?	in Schönebuech	z'Basel	in Rynach
Was machsch bi de Rolli?	Pfyffe	Pfyffe und Seich mache	Pfyffe
Wieso bisch zue de Rolli koh?	Wäge dr Steffi	Wägenem Papi (Häberli)	Wills mir in dr alte Clique nid gfalle het und wäge dr Nicole
Hesch Du e Brueder oder e Schwöschter? Wenn jo sin die au bi de Rolli?	E jüngere Brueder, dä möchte au emol Pfyffe oder Drummle	1 ältere Brueder wo scho bi de Rolli drummlet und e jünger Schwöschter wo au scho fascht e Rolli isch	e älteri Schwöschter wo au neu zue de Rolli koh isch, die jünger Schwöschter weiss nonig so rächt ob sie emol will Pfyffe oder Drummle
Was für e Gosdym hättsch emol gärn an dr Fasnacht aa?	Waggis	Pinguin	Delfin
Was machsch sunscht no gärn?	Velofahre, Baschtle	Schwimme, Sport, Trampolin springe	Rächne, Baschtle
Was möchtsch emol wärde?	Kindergärtnerin	Tierärztin	Tierärztin
Was isch Di Lieblingstier?	Häsl, Delfin, Kätzli, Rössli	Delfin, Pinguin, Schneeopard	Delfin, Rössli, Schneeopard
Was isch Di Lieblingsfarb?	Gelb	Blau	Blau
Was hesch gar nid gärn?	wenn meh vo andere Kinder bloggt wird	Gras in de Ohre	Streit
Was isch Di gröschte Wunsch?	Ich will emol e Sternschnuppe gseh	Ich will emol mit emene Delfin schwimme	Ich möchte emol uff emene Rössli ritte

Zuetate Streuselstärn



Daig

250 g Mähl

20 g Kakao

1 TL Baggpulver

70 g Zucker

1 Ei

125 g weiche Angge

Streusel

90 g weiche Angge

125 g Mähl

40 g Zucker

1 Päckli Bourbon-Vanillezucker

Gelee/Konfitüre

(guet passt z.B. Johannisbeergelee)

Zerscht us em Mähl, Zucker, Baggpulver, Kakao, Angge und em Ei mitem Mixer e gschmeidige Daig knätte.

Dr Daig kunnt denn für mindischtens 30 Minute in Yskaschte.

Dr Backofe könne ihr jetz mol uf 200 Grad (Umluft uf 175 Grad) vorheize.

Jetz gohts an d' Streusel – dr Angge, Zucker, Vanillezucker und s' Mehl in e Schüssle geh.

Die Masse solange mit de Finger vrrübe bis es glaini Streusel git.

Dr Daig wo im Yskaschte gsy isch, könne dr jetz uf ca 3-4mm Dicki uswaale und Stärnli (oder welli Form ihr au möchtet) usstäche.

Die usgstochene Gutzeli denn ufs Blech lege, wo miteme Backpapier usgelegt isch.

D' Gutzeli könne dr jetzt mit dr usgwählte Konfi bestriche und d' Streusel druf vrtelle.

Ab in Ofe mit däm Ganze – fir ca. 8-10 Minute.

Uskiche loh und denn löhnts euch schmege ☺!

Guet baggli




Nochwuggs / Neu bi de Junge



Wie heissisch?	Luke	Fynn	Gian
Wie alt bisch?	7	12	7
Wo wohnsch?	Riehen	Münchenstein	Riehen
Was machsch bi de Rolli?	Drummle	Drummle und überall sunscht derby sy	Drummle
Wieso bisch zue de Rolli koh?	Wägen mim Mami/Papi	Wäge dr Angie und ihrem Mami sie hän mi zum schnuppere yyglaade und es het mir sehr gfalle	Wägen mim Mami/Papi
Hesch Du e Brueder oder e Schwöschter? Wenn jo sin die au bi de Rolli?	dr Gian (isch gliich alt) drummlet, d’Nora (älter) pfyfft und d’Mia (jünger) wird sicher au emol pfyffe oder drummle	e kleinere Brueder dä möchte aber kai Fasnacht mache	dr Luke (isch gliich alt) drummlet, d’Nora (älter) pfyfft und d’Mia (jünger) wird sicher au emol pfyffe oder drummle
Was für e Gosdym hättsch emol gärn an dr Fasnacht aa?	Ueli	e farbige gfürchige Waggis	Waggis
Was machsch sunscht no gärn?	Fuessball spiele, Trotti fahre	Basketball spiele, mit Fründe traffe und zeichne	Spiele, Turne
Was möchtsch emol wärde?	weiss y nonig	Grafikdesigner oder so öbbis in die richtig	do bin y mir nonig sicher
Was isch Di Lieblingstier?	Löwe	Hund, Tiger	Tiger
Was isch Di Lieblingsfarb?	Grien	hani kaini	Blau
Was hesch gar nid gärn?	Streit/Krieg	Spinat und nährvigi Lüt	Huusuffgoobe
Was isch Di gröschte Wunsch?	Ich bi wunschlos glücklich (oder doch emol Vogel Gryff oder Wilde Maa sy?)	Dass es kai Krieg me git	Do fällt ihm grad nüd yy (oder au emol dr Vogel Gryff oder Wild Maa sy?)


Nochwuggs / Neui bi de Junge



Wie heissisch?	Livia	Simone
Wie alt bisch?	12	15
Wo wohnsch?	z'Basel	in Rynach
Was machsch bi de Rolli?	Pfyffe	Pfyffe
Wieso bisch zue de Rolli koh?	Mir hets in dr alte Clique nümmi gfalle, denn bin y durch d'Antonia zue de Rolli koh	Mir hets in dr alte Clique nümmi gfalle denn bin y zue de Rolli koh wäge minere glaine Schwöschter
Hesch Du e Brueder oder e Schwöschter? Wenn jo sin die au bi de Rolli?	Nei	zwei glaineri Schwöschtere D'Jasmin pfyfft scho bi de Rolli, d'Anja kunnt vielliecht au emol
Was für e Gosdym hättsch emol gärn an dr Fasnacht aa?	Alti Dante	Ueli
Was machsch sunsch no gärn?	Zeichne	Tanze
Was möchtsch emol wärde?	öbbis pflegerischs oder gsalterisch	FAGE
Was isch Di Lieblingstier?	Leopoard	Elefant
Was isch Di Lieblingsfarb?	Pink	Pink
Was hesch gar nid gärn?	Wenn meh aaglooge wird	Streit/Krieg
Was isch Di gröschte Wunsch?	Y bi wunschlos glücklich	Dass y bis an dr Fasnacht alli Märsch usswändig kah

Nochwuggs / Neu bi de Junge



Mir zwei sin nümmi ganz neu bi de Rolli hän uns aber letscht Joor nid vorgstellt...



Wie heissisch?	Julian	Moritz
Wie alt bisch?	8	9
Wo wohnsch?	z'Basel	im Glai Basel
Was machsch bi de Rolli?	Drummle	Drummle
Wieso bisch zue de Rolli koh?	Wägenem Ramon (Brueder)	Wäge dr Ariane und em Oliver Schnepf
Hesch Du e Brueder oder e Schwöschter? Wenn jo sin die au bi de Rolli?	Dr Ramon drummlet au bi de Rolli dr jüngerer Brueder möchte au emol zu de Rolli koh.	Jüngerer Schwöschter sie will au emol zue de Rolli koh
Was für e Gosdym hättsch emol gärn an dr Fasnacht aa?	weiss y nonig	Waggis
Was machsch sunscht no gärn?	Fuessball spiele	Lego spiele
Was möchtsch emol wärde?	Fuessballer	Lokiführer
Was isch Di Lieblingstier?	Weisskopfseeadler	Pinguin
Was isch Di Lieblingsfarb?	Grien	Blau
Was hesch gar nid gärn?	Frieh uffstoh	uffruume
Was isch Di gröschte Wunsch?	Emol bim FCB schutte	Schlecksache

Nochwuggs / Neu für die Junge

Wie heissisch?	Pippo	Prisca
Wie alt bisch?	26 und e paar Jöörli	30
Wo wohnsch?	in Binnige	im Glaibasel
Was machsch bi de Rolli?	Koche, Baschtle, bim Major Gosdym/Larve hälfe y hilf überall wo dr Vorstand vo de Junge um Hilf rief	Y drumme
Wieso bisch zue de Rolli koh?	y bi amene gmietlige laue Summeroobe am Basel Tattoo vo dr Karin überschnurrt worde	D'Caro P het mi mitgshleppt
Hesch Du e Brueder oder e Schwöschter? Wenn jo sin die au bi de Rolli?	nei	Jo e Brueder dä isch bi de Rhyschnooge
Was für e Gosdym hättsch emol gärn an dr Fasnacht aa?	e richtige Appenzeller Senn	e Zyschtigschränzer
Was machsch sunscht no gärn?	Fasnacht	
Was möchtsch emol wärde?	100 Joor alt	Sujetobfrau bi de Junge
Was isch Di Lieblingstier?	Reptilie	Pinguin
Was isch Di Lieblingsfarb?	Blau	Grau
Was hesch gar nid gärn?	Schwobe an dr Fasnacht	Brötlete Lachs
Was isch Di gröschte Wunsch?	Näggscht Joor am JG Weekend wieder dörfe koche	e eiges Boot



Kommissär Rolli Basler und die gestohlene Larve

Am Morgen am 10. ist es am Rümelinplatz vor dem Schnabel am Rosi ihre Alti Dante-Larve gestohlen worden.

Der Dieb ist mit einem roten Velo am Rosi, wo nach dem Morgestraich gemietet amene Aperolli Spritz schlürft und ist, verhaftet und hat ihre d' Larve einfach aus der Hand gerissen.

S' Rosi ist drauf ab aufgeregt an Fischmarkt auf der Polizeipost gesprungen und hat der Kommissär Rolli Basler um Hilfe gebittet. Da hat sich sofort ein Fall angeordnet und hat mit der Ermittlung angefangen. Es ist nicht lang gegangen und er hat drei Velos kontrolliert und sichergestellt und damit auch drei Verdächtige in Gewissheit. Alle drei Verdächtige stritten ab d' Larve vom Rosi gestohlen zu haben. Aber wem gehört s' rotes Velo, mit dem der Raubüberfall verübt worden ist und wer ist der Täter?



Kannst Du dem Rolli Basler helfen?

Fülle dazu die untere Tabelle aus und überführe den Täter!

	Verdächtiger 1	Verdächtiger 2	Verdächtiger 3
Name:			
Art vom Velo:			
Farbe vom Velo:			

Das sind die Hinweise:

1. Ein Verdächtiger heisst Dennis
2. Ein anderer Verdächtiger fährt ein Rennvelo
3. Rechts neben dem Rennvelo, steht ein Klappvelo
4. Ganz links in der Tabelle steht ein Mountainbike
5. S' Mountainbike ist nicht grün
6. Grün ist s' Klappvelo vom Michael
7. Der Uwe steht als Verdächtiger in der Mitte von der Tabelle
8. Der Dennis fährt ein gelbes Velo



musik **oesch** basel

DAS FACHGESCHÄFT FÜR BLASINSTRUMENTE

Spalenvorstadt 27 • 4051 Basel • 061 261 82 03

Rapp | Trans



Verkehrs- und Mobilitätsplanung, Verkehrsmodelle,
ÖV-Beratung, Verkehrstelematik, Ökonomie,
Güterverkehr und Logistik.

Rapp Trans AG – ein Unternehmen der Rapp Gruppe

Rapp Trans AG
Güterstrasse 137
Postfach
4018 Basel
www.rapp.ch

S Tattoo vo A bis Z

– E Zämmefassig vo de zwaitscheenschte Daag im Johr!

Damit alli e vollkommene Überbligg über das hän, wo am disjöhriige Tattoo vor und au hinter de Kulisse, in dr Arena aber au in dr Street, am 3 am Nomidaag und aber au am 3 Znachd abgloffte isch: do isch s Rolli-Basel-Tattoo-2014-ABC!

A wie « Aperolli bidde – ääh Apérol meini ! » Alli Johr wieder isch natürlich dr heimliche Star in unserem Getränke-Agebot unsere heiss geliebte Apérol gsi. Und dä isch, bevorer an d Gäscht serviert worde isch, vo de Rollis zerst sälber degustiert worde (isch jo logisch!). Während bim Zuebereite no e kleine Kampf mit dene verflixte Röhrli abgloffte isch, isch s Trinke sälber umso problemloser gange. Und gschmeggt heds...rollitastisch!

B wie „Bier, Bier und nomol Bier.“ Das guete, gäälde Getränk isch natürlich wäg gange wie warmi Weggli – wär hätts dänkt... Do de Rollis s Wohl vo de Gäscht speziell am Härze gläge isch, hän mir ihne als Zuegob e usgibigi Bierduschi gspändet. Zack, Zapfhahne abjagt und s Rolli-Zält isch im Bier gschwumme. Doch Gott sei Dank hämer e paar Freiwilligi ka, wo sich ohni Zögere grad als Schwumm abote hän...



C wie „Castbar – mir gön no lang nid Hei!“ Wie all Johr ischs am Tattoo erscht richtig losgange, wenn d Vorstellige vrbi gsi sin und au d Street scho zue ka hed. Wär e Privatvorstellig vo de Australier ihrem „Give me a home among the Gumtrees“ het welle gseh, het sich vo iirgendwo e Badge organisiert und isch no in dr Castbar ein go näh. Zwei, drei Rollis hän sich denn zur Ufgoob gmacht, die Castbar nid weniger als vier oder fünf mol au no zue z mache – welli? Das isch e top secret...

D wie „Das isch Muusig!“ Dä Slogan ziiert unseri nid immer richtig sitzende aber trotzdäm klassisch elegant wirkende Tattoo-Shirts. Was die USSag aber bedüted und wär mir überhaupt sin, das het no so mänge Schwoob interessiert. „Ja, was seid ihr denn für ein Verein? Was ist ein Piiikolo? Habt ihr dann auch so Masken während dem Umzug an?“ Die und vieli witeri Froge hän mir Rollis mit Geduld beantwortet, schliesslich wän mir stetig zur Vrbesserig vom Allgemeinwüsse vo unsere Nachbere bitrage!

E wie „Edinbörg...Edinburg? Edinbrah!“ Jä, de Name vom grosse Bruder vom Basel Tattoo hed für mänge Lacher gsorgt. Jede het drüber gredet, aber keine weiss, wies eigentlich richtig usgsproche wird. Do hets s Basel Tattoo scho e bitzeli eifacher. Doch au wenn dr Name vo unserem Tattoo nid ganz so pompöös dönt, chas längschtens mit dr Schottische Usgob mithalte. Au das Johr heds vermöge z begeistere und mir ziehn unsere Huet vor allne Beteiligte – Schappo!



F wie „Fallschirmspringer – ja, wo fliegen sie denn?!“
D Musik-Rekruteschuel vom Schwizer Militär het sich für das Johr öbis speziells usdänggt: anstatt militärisch langwilig in Reih und Glied durch Kasärne z laufe, hän si ihri Fallschirm-



Kollege no in dr Uftritt iibunde. Mit genauchter Präzision sin die ufere Matte inmitte vo de Arena glandet. Nur eimol hets eim nid ganz glänggt... und är isch in dr Klingetalstross 1 glandet. Zuefall...?

G wie „Grosses Kino mitem Gross!“ Und grad nomol hän mir Schwizer chöne stolz sii uf unser Mitwirke am Tattoo. E Highlight das Johr isch dr Jonas Gross us em Aargau gsi. Mit sinere Panflöte hetr s Publikum in si Bann zoge und sich ab und zue zunere Privatvorfiehrig in dr Castbar verleite loh. Logischerwiies hetr do drmit e grossi Gruppe an Groupies chöne um sich schaare, abr ins Bett gno hedr denn doch nur sini gliebt Pan-Flöte.

H wie „Häiländ-Dänzerinne – husch und hopps!“ Was wär e Tattoo ohni die lichtfiessige Dänzerine wo us de verschiedenschte Ort vo Australie kömme! Au wenn ihri Vorfiehrig ame liicht an ihr Nationaltier erinnert, ischs doch immer wieder schön, zum beobachte und sicherlich ein vo de renommierte Uftritt an de Basel Tattoos. Und wenn die Dänzerinne nach ihrem Uftritt top gstylt in d Castbar ghuscht sin, hed sich no mänge im Schotterrock nach ihne umdreiht...

I wie « In Erinnerung an unser Schnitzelbrot.. » Liicht wie Neuschnee ligt s Mähl uf em Giabatabrötli. S Brot, weich und luftig, umhüllt s schmackhaft gwürzte und bis zur Perfektion duurebrötlete Fleisch. Sanft tropft ändwäderscharfi Barbecue-, orientalisch Curry- oder formidabli Tartare-Sauce use. Im Hintergrund hört me Ängeli singe..wär hed jetzt au grad Luschd uf sone Rolli-Schnitzelbrot?

J wie „Jubiläum – 10 Jahr Basel Tattoo!“ Zu däm erste runde Geburstag chunds fürs Basel Tattoo im nägschte Jahr. Dass sich d Massed Pipes and Drums denn öbis speziells wärde ihfalle loh, vo däm chame usgo. Das grosse Fest findet im 2015 vom 15.-25. Juli statt, denn aber leider ohni Schnitzelbrot vo uns Rollis. Wär aber jetzt scho Tattoo-Entzugerschiinige hed: es git jo Gott sei Dank no s Christmas Tattoo im Dezämber (Anm. d. Red.:au ohni Rolli)!

K wie « Keenig vo Basel » Nei, mir rede do nid vo unserem fägende Drummeli-Marsch. Am Tattoo losd sich no so Mänge gspässige Gast blicke. In däm Jahr hän mir d Ehr ka, dr (sälbsternannti) Keenig vo Basel bediene z dörfe. In sim chinesische (Bade-)Mantel hed är sich immer ufs neue Wii us em geweihte Rolli-Land liefere loh. Und au sini zwei asiatische Hofdame sin nid z kurz cho: güetig, wie dr Keenig gsi isch, hed är ihne Schmütz und Umarmige spendiert. Als Service-Personal hed me däm Gott sei Dank mit eme elegante Knicks flink chöne entgo.

L wie „Lotusblüetepracht...“ Das Jahr het s Basel Tattoo e Gascht us witer Färni empfangen: d Changxing Lotus Dragon Folklore Group us China. Farbefroh hän si Legändene us ihrem Land nochegstellt, und schnäll isch mol useme Hufe Lotusblüete e grosse, sich durch d Arena schlängelnde Drache worde. Nach ihrem Uftritt hän d Künstler us Asie d Lotusblüete an de Stange durch e GoPro ersetzt und sin durch d Castbar ghuscht, uf dr Jagd nach Selfies. „Attention..Smiile“!



M wie „Massed Pipes and Drums – Saggstargg!“ Wie immer s Highlight vo jedem Tattoo: dr Ufmarsch vo de Massed Pipes and Drums. Wenn all die Dame und Herre in ihrer schottische Traditionskleidig im Gliichschritt in d

Arena vo dr Kasärne iimaschiere, stellt sich au s kürzischte Hoor uf de Ärm vom Publikum uf. Und zu unserer Freud hed dr Wind oft d Kläng vo de Duudelsägg bis zu uns ins Zält bloose. Do ischs Tablet kurz abgelegt und dr Momänt gnosse worde. Sooo scheen...



N wie „Naaah Tsvenjaaa Nabalitsi babaa.“ Lion King und s Basel Tattoo – das isch öbis, wo nur d Castbar vmag zämmezfiehere. So ischs drzue cho, dass sich am 4i am Morge e kleins Ründeli us ehemolige Top Secret-Mitglieder, eme Beat boxer und e paar Schotte gformt hed und die dr Evergreen vom Elton John zum Beste gäh hän. Und wie so oft sins genau die spontane, nüm ganz niechterne Aktionen, wo s Tattoo einzigartig mache!

O wie „Oh lägg du mir am Tschööpli“ D Song- uswahl vom Tattoo überrascht immer wieder. Nachdäm s Publikum letscht Johr „Gangnam Style“ vonere Gruppe vorgspiilt und tanzt becho hed, isch es au disjoohr in Gnuss vomene doch e bitz speziellere Lied cho: Bim finale Ufmarsch vo allne Beteiligte isch tatsächlich „Oh läck du mir“ aagstimmt worde. Näbem Publikum hän au d Künstler us China probiert mitzsinge, do hets denn aber vrmuetlig eher wie „Oh läck du mil am Tschöppli, oh lutsch du mil de Buckel ab...“ dönt.



P wie „Parade zieht durch Basel!“ Natüürlich heds au in däm Joohr wieder die grossi Tattoo Parade gäh, wo am Samschdig durch ganz Basel zoge isch. Do hän denn au die ohni Ticket d Möglichkeit becho, Gruppe ne wie d „Singapore Armed Forces Band“, begleitet vo traditionelle Tänzerinne us ihrem Land, oder d „Australian Army Band“ in ihre „Slouch Hat“ gseh z chöne. Wie immer e Highlight für die ganzi Stadt.

Q wie „Qualität vom Fiinschte“ Dass das Tattoo so gued funktioniert, isch natürlich kei Sälbstverständlichkeit. Das isch all dene flissige und freiwillige Hälfer z verdanke, wo sich jedes Johr in Schaare mälde. Unter ihne gits au vieli wo bi uns am Stand no ab und zue mol e Bier mit uns gno hän. Und so wird's Tattoo für uns nid eifach nur e Job, wo mir unseri Stunde abarbeite, sondern isch immer e freudige Aalass, wo me vieli guedi Lüt kennelernt



R wie „René Häfliger – Ja, er lebt noch.“ Was wär s Basel Tattoo ohni dr Häfliger. Wenn me s erschde mol sini Stimm hört, wo d de Gäscht dr Afang vo dr Show vrkündet, isch es scho e bitz e Gfühl wie Heime cho. Liebe René, du ghörsch eifach zum Tattoo wie e Basler Marsch zumene Ändstreich!



S wie „Swiss Highlanders“ Zur Überraschig vo vielne sind d Duudel-saggvrträter in däm Johr nid nur us Grossbritannien cho. Nei, au e Gruppe us de Schwiz isch in dr Arena ufträtte. Erst 2008 sin d „Swiss Highlanders“ gründet worde und sin jetzt scho am Basel Tattoo drbi. Und das nid eifach in enre billige Kostümkopie vo de Schotte, nei, si hän ihre eigens für si entworfene Tartan trage, dr „Swiss Highland Tartan“. Und au musikalisch hinke sie ihre Schottische Vorbilder kei Stück noche. Well done!



T wie „Top Secret – Gheimnis sin glüftet“ E Tattoo ohni Top Secret chame sich eigentlich gar nid vorstelle. Obwohl d Drummelgruppe das Joohr kei Uftritt ka hed, hän sich doch einzelni Mitglieder immer wieder in de Street und Castbar blicke loh. Und so sinmir zu paar Infos cho, wo mr do doch au möchte teile: Jä, si hän so einigi Groupies, nei, es heisst nid Tambuure und Pauker sondern Snare Line und Base Line und jä, si nämme no immer ein, das isch kei Frog.

U wie „Unändlich vieli Zahle“ Das Johr isch s Basel Tattoo bereits zum 9te Mol in Basel in dr Kasärne ufgfiehrt worde. Über 15 Vorstellige hinwäg sin bis zu über 120'000 Zueschauer in d Arena gströmt. Au d Parade hed über 100'000 Lüt in d Stadt zoge. Bis es wieder sowit isch, gohts no 8 Möned und zwei Daag. Und lut eigenere Hochrächnig sin gfühlti 1 Million Liter Bier über unseri Theke gange.

V wie „Verrugte Vogel!“ Jä, so eine isch regelmässig am Afang vo jedere Show über d Arena gfloge. Ghandlet hed sichs drbi um s Modäll „Junkers Ju 52“, liebevoll au „Tante Ju“ gnennt. Dä riesigi Diefflieger isch nur 300 Meter über d Köpf vom Publikum hinwäg grauscht und hed mit sim Uftritt s 100 jöhrige Bestoh vo de Schwizer Luftwaffe zelebriert. Und als grosses Finale an dr Derniere sin nid weniger als 9 Flieger über d Arnea braust!

W wie „Wasser marsch!“ Das isch wohl s Motto vom Petrus während dr disjöhrige Usgoob vom Basel Tattoo gsi. Was do alles vom Himmel abe cho isch, unglaublich! Innerhalb vo wenige Minute hädd me an so mängem Obe d Tattoo Street in e Surferparadies könnte umwandle. Abr au vo dene Monsun hän mir Rollis kei Halt gmacht und flissig witer gschaft. Räge macht jo bekanntlich schön.

X wie „Xts Bier.“ Bruchts do wirkli e Erklärig..?

Y wie „Yberbligg bhalte!“ Jä, das isch doch nid immer ganz so eifach gsi. Wenn s Publikum nach dr Show bierdurschtig us de Arena gströmt isch, isch die bierverteilendi Ursi scho ame faschd über rennt worde. Oder wenn d Gäst vor dr Show schnitzelhungrig in Masse an unserem Stand ahgstande sin, isch unsere Grillmeister dr eint oder ander Schweisstropfe uf dr Stirne gstande. Doch irgendwie simer immer Herrscher vom Chaos gsi und zum Schluss isch jede zfriide drvodagelet.



Z wie „ZEM WOHL!“ Mit däm letzte Buechstabe vom Tattoo-ABC erhebe mir unser Glas uf alli die, wo so flissig in de letzte drei Johr mitgholfe hän. Es isch immer e riiese Spass gsi, sig das im Service, am Grill, am Zapfhahne oder an dr Kasse. Ich glaub mir rede für alli, wenn mir sage, dass mr die Zit scho chli wärde vrmissen und uns sicher freue, wenns denn mol heissd „S Rolli-Schnitzelbrot isch zrugg am Tattoo!“ Und jetzt: **Zem Wohl mitenand!**



...hett stattgfunde



Aläss / Grillplausch, 21.8.2014





BASLER-ROLLI SCHLAGER- MOVE 2015

IRGENDWIE SINN MR FASCHT ALLI IN DR SCHLAGER SZENE GROSS WORDE. ABER SISCH GAR NYT AIFACH GSY E PASSEND S COSCHTÜM Z FINDE. GANGI JETZ IM PÜNGGTLI LOOK A LA 70 ER JOHR ODER GANGI ALS ELVIS MIT SCHLAGHOSE ODER SOGAR ALS HAIR-GIRL? ESO HETT JEDE DIE WAHL DER QUAL KA. AINZIG S OK HETTS AIFACH KA, DIE SINN NÄMMLI UFF HAMBURG GO SICH YYSTIMME LOH UND HÄNN DENN DAS ZUM AALOSS GNOH SICH UFF DAS MOTTO Z EINIGE FÜR DR BUNT OBE. E GENIALI IDEE, AN DÄRE STELL VIELE HÄRZLIGGE DANK FÜR DÄ SUPER OBE, Z ORGANISIERE UND DR GROSSI SAAL Z DEKORIERE ETC. ETC. CHAPEAU!!

PÜNGGTLIGG AM 6 i SINN MR IN DR SAAL ERÖFFNIGS SCHLANGE GSCHTANDE ZUM DR YYTRITTSBATZE ZAHLE. DRFÜR HÄNN MR E APERÖLI ODER SO BEKO ALS BEGRIESSIG. DR SAAL HETT SICH NULLKOMMA NICHTS MIT FARBIGE LÜTT GFÜLLT IN COSTÜM. ME HETT GSCHTUUNT UFF WAS FÜR IDEE D LÜTT ALLI KÖMME. VO DE 4 JAKOB SISTERS MIT 3-FACHER PUDELVERSION UND EM HEINO IN MEHRFACH USSGOB, JUNKIES, MINIRÖCKLI IN FLOWERPOWER PRINT UND D HERRE IN SCHLAGHOSE UND HOORROLLE, ALLES ISCH VORHANDE GSY. ALLI HÄNN SICH SUPER MIEH GÄH ORIGINELL DRHÄR Z KO. S ISCH NYT E FROMMBALL GSY ABER E FROMMI SAUGLATTI SCHAR.





DR OBE HETT SUPER ATTRAKTIONE KA UFF DR BÜHNI .
GSCHTARTET HÄNN DIE BRAVE GLAINE. S HETT SICH ABER DENN
GLY USEGSCHTELLT DASS SIE EBBE NYT IMMER SO BRAV SINN IN DR
YYEBIGSSTUND. ABER SIE SICH SOGAR SEHR WOHL FÜHLE INERE 2 TE
HUUT UND SÄLBSCHT DENN NO E SUPER ARABI UFF D BÜHNI BEKÖMME.
DANKE VIELMOL FÜR DIE SUPER IDEE.. MIR HÄNN TRÄNE GLACHT.
AU S DUETT MODERN TALKING MIT LUFT GITARRE ISCH DR BÖRNER GSY.
HÄMMER DO EVTL. VERSTECKTI TALÄNT GSEH ?
DENN ISCHS S PROGRAMM WITTER GANGE VOM CLIFF RICHARD ÜBER
SCHNULZE SOLOSÄNGER ROY BLACK MIT SINERE GANZ IN WEISS FRAUE
SCHAR UND ERE 12 ER BLONDIES FORMATION WO TANZT HETT ZU
MARMOR, STEIN UND EISEN BRICHT.
JOJO AU DIE ALTI GARDE BEKÖMMES BAI NO ÜBER D HÜFFTE
(MIR HÄNNNS IM VORFÄLD SEHR SEHR LUSCHTIG KA ZUM
YYEBE).





Dangge Andrea & Philipp



D KUCHI-CREW HETT AU ALLES GÄH, SPAGHETTI MIT 2 SAUCE UND EM SALAT ISCH FEIN GSY UND D CREMSCHNITTE AU SEHR LECKER.



EUCH ALLNE NOMOL, IM OK HINTER DR BÜHNI, VOR DR BÜHNI UND AN DR BAR, AN DR KASSE UND IN DR KUCHI E GROSSES MERCI IM NAMME VO ALLNE WO DRBY GSI SINN, SISCH E SUPER GLATTE OBE GSY UND ES HETT AIFACH ALLES PASST. ALLI WO NÄMMLI NYT KO SINN, HAENN E SUPER TOLLE OBE VERPASST



AINI VO ALLNE



Dangge an d Kuchitigerli!



Dangge an d Bar-Pfärdli!





D Blondis - psssst - top secret

E Uffruef vom OK „Bunte Oobe“ hett e baar Pfyffere nach dr Schtund am Schtammtisch schpontan derzue animiert: do mache mir Fraue doch mit!!! E Schlaager singe... danze...oder...oder...oder..

D' Anita hett derno Aendi Septämber s'erschte Mail an alli AG - Fraue usegloo - alles unter „top secret“!

12 Fraue hänn sich für e Dailnahm gmäldet und zunere erschte Sitzig im Kaffi Sandwich troffe. D' Anita vollpaggt: Lääbtop, Schlagerhitlichte, CD, etc. - d Idee sin nur eso gschprudlet! Gly isch dä „Schtrumpftanz“ und der Hit vom Drafi Deutscher - Marmor, Stein und Eisen bricht... als Favorit feschtgschtande; jetzt mien mir's nur no mache!



Mer bruuche: wyssi und schwarzi Schtrumpfhose, Ring us Karton, blondi Perügge, Sunnebrülle, Hoorraif, Rollilyybli und öbber wo ka e Choreographie mache... und d Zyt isch gloffe, der 15ti Novämber isch nöcher und nöcher ko! S'lebe isch au in d Hoose gange, d Motivation gsungge - mer hänn d Gränze gschpüürt.....


aber mir hänn uns an der Idee feschtbisse und duurezooge und sinn als „Blondis“ zämmegwaggse!

Der „Bunti Oobe“ isch nöcher gruggt, d Schtrumpfhose sinn jetzt gääl, Rollilyybli hänn alli, d Hoorraif und Sunnebrülle au, ebese d Perügge und die letschti „Schrittkombination“ isch jetzt au allne klar! Dr Probedurchlauf uff der Bühni am Samschtigmorge hett uns die letschti Sicherhait geh - mer schaffes - mit „professioneller“ Glassehait hämmer däm Ufftritt entgegiefieberet...jetzt Blondis - mer mien uns go umzieh - in die gääle Schtrumpfhose yneschlupfe, in d Raye schtoo, d Asaag vo de Blondis, duureschnuufe, dr Vorhang goot uff und d Muusig lauft ...Mer danze zu ... Marmor, Stein und Eisen bricht, aber s Vortrab/Pfyffergrübbli nid!!!

Es hett gfäggt und groggt! - Applaus, Applaus und e Zuegoob wird gwünscht - was wämmer meh? - Danggscheen Blondis!!

Esti und Company

Ihr **Wein-** und **Getränke-** **Lieferant**



Theo Rietschi AG
Getränke en gros



Hahn-Rickli AG
Weinkeller

Geschätzte Leserin, lieber Leser

Ich muss feststellen, dass mir das Schreiben für den Voilà-Artikel auch schon leichter gefallen ist. Darum schon vorab meine Entschuldigung für einen knackig-knappen Artikel in dieser Ausgabe.

Auch wenn man uns bereits mit den ersten Weihnachtsbäumen und dem entsprechenden Klimbim droht (fast ein Revival unseres letzten Sujets), soll doch nochmals auf die vergangen Monate zurückgeblickt werden. Ein Fokus war natürlich auch in diesem Jahr das Tattoo und unsere Beiz. Nachdem auch die dritte Ausgabe ein voller Erfolg war, entstehen fast etwas wehmütige Gefühle beim Gedanken, dass das vorerst das letzte Mal war. Ist doch dieser Anlass zu einem festen Bestandteil des Rolli-Kalenders geworden. Und so sollen die Bilder uns nochmals an manche schöne Stunden, heisse Aktionen und tolle Kameradschaft über alle Grenzen hinweg erinnern.



Und der diesjährige Anlass hatte auch noch den tollen Nebeneffekt, dass ein ehemaliger Rolli nach ein paar Jahren und etlichen Umwegen wieder zu uns zurückgefunden hat. Wir haben Kurt natürlich gerne und mit offenen Armen in unseren Reihen aufgenommen. Und wie üblich konnte ich ihn dazu motivieren, sich hier kurz vorzustellen:

Zrugg bi de Rolli

Liebi Rolli

Viile Dangg dass ich nach 27 Joor wieder dörf zue euch zrugg koo als neue Pfiffer bi de «Alte».

Drzwüsche bin i bi de Naarebaschi gsii wäge Eidg. Dambuurefeschter etc. Will i aber nümme esoo viel iebe will und d Naarebaschi kei Alti Garde hänn, han i echli ummegluegt und bi jetzt froh, dass ich bi de «Alte Rolli» dörf iistoo.

Alti Garde / Kurt / René

Mi Bruef isch Zivilschutzinstruggdr im Usbildigszentrum Bäumlihof und als Hobby baschtle ich gärn und bi amme mit em Sitontop Kajak uffem Rhii. Ich wohn mit dr Familie inklusiv zwei Buebeli im Alter vo 31 und 28 in dr Breiti.

So, das wärs über mi. I freui mi uff die nägschti Fasnacht mit de Rolli.



Kurt Schneuwly



Mir gratuliere!!

Und da soll noch jemand sagen bei den Alten bewege sich nichts!!

Am 12. Juni 2014 haben sich Madlaina und René im engsten Kreise im Standesamt Basel um 11.00 das Ja Wort gegeben. Bei prächtigem Sonnenschein und Bruthitze.




Mir gratuliere und wünsche
alles Gueti!!!

Und somit sind wir schon wieder zurück in der Vorweihnachtszeit. Mit Elan haben wir nach einer langen Sommerpause unsere Übungsstunden wieder aufgenommen und bereiten uns langsam und stetig auf die kommende Fasnacht vor. Und männiglich ist natürlich gespannt auf die anstehende Sujet-Präsentation.

In diesem Sinne und bis zum nächsten Mal

Rolli unterwäggs / Herrebumml, 20.9.2014

An däm herrlige Summrdaag hän mr uns am halbr 11i vorem Bruune Mutz troffe. Mr sin insgesamt 16 Herre gsi. 3 sin no spötr drzue gtosse. Nochere Stund warmlaufzyt isch dr 11er grad rächd koo. Mr hän dä gnoh und sin in Richtig Aesch abfahre.



Bim Schaulaagr isch für uns abr scho Ändstation gsi. Nochm Usstyyg isch dr Bumml so richtig loos gange. Mr sin bummllet und bummllet...s het kuum wel le hööre.... noo ziemlich genau 10 Minute schlendere, sin mr aakoo bim **Reto Lippold** in sinnere Garaasch. Zerschd hän mr no befürchtet, mr mien ab uff s Velo, denn im glyche Huus hets e Velogschäft. In dr Garaasch vom Reto hän mr dörfe sini Oldtimers bestuuhne. E wohrlig yydrüggli Sammlig mit spannend vrzellte Gschichte rund um s Thema Auti und Oldtimer. Nocheme feyne und wäährschafte Apéro isch s denn wytrgange. Miteme Gaschparini Glace im Gepägg (dr Gaschparini „wohnt“ im glyche Huus) zrug uff Basel-Stadt am Rhy. Wägg uss Eusem Baselbiet.



An dr Schiffländi dr näggschd Fuessmarsch. Übr die Mittlr Brugg an d Uufr-promenaade im Glaibasel bis zur Johannitrbrugg. Dort untr dr Brugg bim **Wasserfahrverein Horburg** hän mr d Räschde vom Zvieri vo de 3E-Gsell-schaft dörfe vrzerre. Dr Stohli het uns das wundrbar mundgerächd präpariert. Phänomenaal.



Öbbe e Schtund

spöotr hän uns zwei vo de Wassrfahrer uff äim vo de Langschiff uffm Rhy umegfiehrt. Zerschd Flussabwärts und denn Flussuffwärts bis zum Wild Maa-Horscht. Dort isch Ändstation gsi. Usstyyge und ab zum näggschde Apéro. Au dää isch mitm vorhärgehend kum z vrglyche gsi. E kulinarische Höhepunggt :-)




Rolli unterwäggs / Herrebumml / Teil 2

Dr **Dieter Graber**, Vorsitzende vo dr Ehregsgesellschaft Gryffe, het uns denn mit e paar Wort ins Lääbe vom Vogl Gryff-Daag ygfiert. Uns erklärt, wie das damals zue däm koo isch und wie dr Bruuch sich in dääre lange Zyt wytrentwigget het. Au dr Horschtsälber isch sehenswert und s steggt e riese basler Glaibasler-Gschicht drhinter. Hejo, schliesslig isch dr Vogl Gryff dr ältischd Bruuch in dr Schwiz.



Mitte me gmietlige Schpaziergang... also ussr dr Ronnie hän en glaub alli gnosse...isch es denn wider in Richtig vo dr Mittlere Brugg gange. Aaghalte hän mr denn erscht wider bim Schoofegg. Dört hets Apéro gäh - widerum e Vrköschting uff höggstem Level. Aaschliessend sin mr in d Linde gwäggslet. E feyns Nachtässe mit zwei drei Uelisäft drzue - herrlig.



Usblämperlet, wie hets au anderschd könne syy, isch dr Oobe bim Schoofegg worde. Bis in alli Nacht yyhne, sogar denn no bi wenige Räägedröpfli. Grüchtewyys heigs denn sogar no dr eint odr andr wyyblig Dambuur, reschpeggtiv Pfyffr gha wo untrwäggs gsi isch.

Ganz e grosses Danggschön an die beide Organisatore.
Für s Voila – B.K. uss B.

Rolli unterwäggs / Frauebumml, 20.9.2014

Mir hän uns am 3 zum Apéro troffe, s Wätter isch herrlig gsi und d Vorfreud gross! Was erwartet uns ächt?

Noch eme feine Prosecco het uns s OK lo Gruppe bilde und so simr los zoge, 3 Gruppe mit je 100 Stutz im farbige Ballon. Mr sin durch d Strosse vo Basel zoge und hänn unseri userkorene Fraue ykleidet. Aber wie???



'Motto: Rotliechtmillieu im Joor 2069'

Es isch e riese grosse Spass gsi und es isch glaub kei Aug trocke bli-ebe, egal, in wellem Laade, egal in wellere Gruppe, s isch eifach luschtig gsi!

Dr 2. Apéro het uns us unserem ‚Postshoppingbiorhythmischedief‘ use gholt und d Fähri het uns denn übere Bach brocht. Im Räbuus isch scho deggt gsi und mir hän dankbar die miede Bei untere Disch gstreggt.

Noch em feine Ässe isch denn s grosse Finale ko:

Vor ere gnadelose Jury hän unseri 3 Queens präsentiert, was in dr Stadt kauft und zämme gstellt worde isch. S OK het sträng Revision gmacht, damit au jo niemer s Bugdet het könne überzieh!

Unseri Models hän sich gegesittig übertroffe und toppt und sich gekonnt und cool enere tobende Fraueschar präsentiert. D Schar het tobt und ablaudiert und es isch au Gekreische z höre gsi!

Mängs Mannequin wurd vo some Uftritt träume und die Konkurrenz vo de Rolliqueens fuchte! Danke an euch 3 tolle Fraue, ihr sin wirklich grossartig gsi!

Wo alli wieder normal gschnuuft hän und s Dessert verputzt gsi isch, hämr dr Georgette no gholfe uszdringge und somit het dä Bummel e sanfte und schöne Abschluss gfunde.

Liebs OK, liebi Fraue, danke für e herrlige Daag!
Isabella

Rolli unterwegs / Wellness in Todtmoos


D Wyber fahre uf Todtmoos
Danke, Therese, s'isch famos!
8 Fraue vo de Rolli
Mit Tasche und mit Trolly.
2 drvo sin spöter ko,
sy hän dr Aperero denn au no gno.
Zum shoppe sin mr downtown gange,
Für Dirndl, Schäl, grad ab dr Stange.
„Cültür“ isch au uf em Programm gstande,
denn schnäll e Cüpli zum wieder lande.
Noch em 3. Apéro hän mir s Znacht denn zue-nis gno
und sin mit neue Gürtel, Bluse, Hoose
in dr „Spitze“ go Disco-Musik loose.
Nochem Schlummerdringg in dr Hotelbar
Hämr denne gschloofe, wunderbar!
S Zmorge am Buffet isch riichhaltig gsi
Mit Brot, Angge, Konfi und English Tea.
Denn simr abe in Wellnessbereich,
glaubed mr, das isch kei Seich!
Massiere, knätte, creme und Nägeli moole,
mir hän uns prächtig kenne erhole!
Im schigge Badmantel kli chille,
d Scheiche an dr sunne grille,
alles isch perfäkt,
nur bi dr Gugge sind glaub d'Inschtrumänt defäkt.
Die tröte und lärm umenand,
lägg mir, es kracht jedi Wand!
Mir sage: egal
Mir hän drführ e neie Schal!!! Ha!
Bi dr Therese und em Markus uf dr Terasse
Hen mirs üns güüt goo lasse
Die letschte Sunnestrahle im Gsicht,
und scho isch das Wuchenänd wieder Gschicht.
Danke, liebi Fraue,
s dunkt mi, uf euch ka me baue!
Danke liebi Therese, liebe Markus
Es isch herrlig gsi bis am Schluss

25. Oktober 2014



Isabella mit viel Hilf vo dr Anina, Evi, Diana, Barbara, Olivia, Rahel, Bea
36

Rolli unterwäggs / Ussflugs-Tipp



Dr nägseth Friehtlig
kunnt bestimmt

....und denn kamme widder go Wandere, zum Byspyl in dr Innerschwyz vo Gyswyl uff d'Fluonalp.

Mit em Zug fahrt me bis Gyswyl, dasch grad zhinderscht am Sarnersee.

Vo dört uss lauft me denn zerscht e Stüggli dr Strooss entlang Richtig Mörlialp, Glaubebiel, bi dr Brugg zwygt me denn linggs ab und lauft em Altibach entlang duruff Richtig Zopfwald (nai es hängge kaini Zöpf vo de Bäum abe).

Dört trifft me aber uff e historische Wanderwäg, wo aim mit Dafele am Wägrand erklärt wird, wie si friehner s'Holz vom Bärg ins Dal abeglo hän, nämmlig uff em 'Reistwäg'.

Si hänn 'Holzleit' baut, wo si denn d'Baumstämme hänn könne wie uffere Rutschbahn abesuttere loh.

Überräschte drvo gseht me am Wägrand.

Uff em Wäg bis zur Fluonalp hets zwüschedure au härzigi Grillhüttli, wo me ka verwyle.



Es brucht gueti Schueh und e bitz Kondition duruff, me wird aber denn mit ere traumhafte Ussicht belohnt und ka sich im Bärgbeizli vo dr Fluonalp (www.fluonalp.ch) widder stergege.

Durab gits verschieden
Mögligkaite, do kame je
noch Zyt und Luscht
wähle.



Schwarzes Brätt

*„Die besinnlichen Tage zwischen
Weihnachten und Neujahr haben
schon manchen um die Besin-
nung gebracht“*

(Joachim Ringelnatz)

An das Brätt kasch alles schriebe:

- Buechtipps
- Partnersuechi
- i suech/ha gfunde
- Kochtipps
- Kurioses
- Anekdote
- Grücht
- my Läbensgschicht
- i will öbbis düschle
- neu Restaurants

Liebi Rolli, wenn ihr
Föteli händ vo unsere
Aläss, denn diend die
bitte dr Nadine schigge,
ansunschte seht me
immer die gliche Kepf
im Heftli

- die bequämschti Fasnachtsfrisur
- Mitfahrgläheheit etc.

Hesch öbbis z'mälde, denn schigg
e Mail an baslerrolli@gmail.com

Ufleesig vom Quiz S. 15:

Wäm ghört s Velo womit dr Raubüber-
fall uf s'Rosy vriebt worde isch?

Em Uwe ghört s rote Rennvelo!

*S nägschte Voilà kunnt erscht nach dr Fasnacht
use - d Routeplän wärde separat vrteilt !!!*

Vorschau uf die nägschte Usgoobe:

- Nachwuggs
- Drummeli
- Fasnacht
- Bummel
- Grillplausch

Jos. Kym AG, Maler Gipser



*mir mole, gipse
und tapeziere*

vielseitig · fair · zuverlässig

Reinach · Laufen

Telefon 061 711 34 58 · www.kymmaler.ch

Schwarzes Brätt / Budget-Fasnacht/Fasnachtsbudget

Budget-Fasnacht ↔ Fasnachtsbudget

